

**Govor zamjenika predsjedatelja Doma naroda Parlamentarne skupštine BiH
Mustafe Pamuka na zasjedanju Asocijacije europskih senata u okviru teme "Gornji
domovi parlamenata i njihova funkcija u 21. stoljeću"**

Prag, 29. rujan 2006.

"Cijenjene kolegice i kolege

Poštovani gospodine predsjedniče, prije svega želim da Vam, kao našem domaćinu čestitam desetogodišnjicu obnove Češkog Senata sa uvjerenjme da će Senat nastaviti svoj uspješan rad kako na domaćoj tako i na evropskoj sceni.

Istovremeno izražavam zadovoljstvo što sam u mogućnosti da se obratim na, za mene posebno cijenjenom skupu.

Dame i gospodo

Zakonodavna vlast posvuda teži tome da proširi sferu svoje aktivnosti i da prisvoji svu moć. Vlast kao takva u savremenim društvima se mora dijeliti. To se čini podjelom nositelja zakonodavne vlasti tj. parlamenta na dva doma, donji i gornji.

Jedna od određujućih karakteristika države a time i parlamenta je broj domova koji sačinjavaju Parlament. Prema tome, postoje jednodomni i dvodomni parlamenti.

Naprimjer u federalno ustrojenim državama prvi dom predstavlja građane kao cjelinu naroda, a drugi dom predstavlja federalne jedinice. Tako se omogućava da manje pokrajine ili regije budu jednako zastupljene kao i veće. Zajednička značajka svih federalnih ideja je osnovni princip po kojem je članici zagwarantirana samostalnost, ali je istovremeno obavezna da u okvirima svojih moći doprinosi općem blagostanju.

U cilju dobijanja političkog i privrednog uticaja polazna tačka je mnoštvo slobodno obrazovanih, regionalnih, političkih, privrednih, religioznih, etničkih i drugih interesnih grupa.

U pluralističkoj teoriji stoji da se ova borba između interesnih grupa ne smije odvijati u formi nesređene borbe svim sredstvima, nego u formi konstruktivnih djelovanja izrađenih na kompromisima s ciljem postizanja zadovoljavajućeg rezultata za

sve. Pri tom se ipak ne očekuje da se ovaj proces odvija sam od sebe i tako dovede do utopije, nego je predviđeno da se država uoči, usmjeri i regulira, odnosno prevaziđe.

Kao što vam je poznato Bosna i Hercegovina je multinacionalna država. Njen Parlament je dvodomni i domovi su apsolutno ravnopravni u zakonodavnoj proceduri. Osnovna zadaća Doma naroda kao gornjeg doma, jeste zaštita vitalnih nacionalnih interesa.

A šta je to nacionalni interes svi to dobro znamo. To je između ostalog jezik, kultura, obrazovanje.

Imajući ovo u vidu Dom naroda u Bosni i Hercegovini ima neprocjenjivu ulogu u funkcioniranju države. Pored zaštite nacionalnih interesa, po mom mišljenju, Dom naroda bi trebao da vodi brigu i o ravnomjernom privrednom i svakom drugom razvoju regija.

Sagledavajući sve izneseno Gornji dom je potreban u 21.vijeku kako bi predstavio raznolikost interesa u Evropskoj uniji, interese regija unutar država a i interese između država i naroda, kao i radi očuvanja ravnoteže i umjerenosti nasuprot Donjem domu u kojem su zastupljeni građani.

Na kraju ne treba zaboraviti da je Evropska unija zajednica država koje dijele zajedničke vrijednosti. U središtu života je čovjek pojedinac i njegova prava i obaveze. Obitelj predstavlja srž organizacije života evropskog čovjeka. Zdrava obitelj je temelj evropskog društva, čime Evropa rasvijetljuje putokaze cijeloj ljudskoj zajednici." (kraj)